

140 *Relation de la Nauuelle France*

J'ay parlé cy-dessus du Baptesme d'un nommé Emery Tchames. Ce bon Neophyte se retire ordinairement à Tadoussac; s'il continuë comme il a commencé, il aidera puissamment ses Compatriotes à se ranger sous les drapeaux de la verité. Je l'ay veu souuent, dit le Pere, vne demie heure entiere apres les prieres communes, priant Dieu les mains jointes, & les genoux en terre, posture tres-penible aux Sauvages; avec vne telle ferueur, qu'on voyoit bien que son cœur alloit plus viste que ses levres. La nuit me promenant à l'entour des cabanes, ie l'ay par fois aperceu dans cette posture, sans qu'il eüst cōnoissance que ie le regardasse. Son oraison faite en secret, estoit bien conuë de celuy qui change des pierres en des enfans d'Abraham quand il luy plaist, Dieu l'éprouua par vne maladie, qui luy donna sujet de se fortifier en la Foy. Le Diable prit son temps, il le voulut troubler dans son sommeil. Il vid en songe vne personne qui luy disoit; Fais vn festin à tout manger: si tu veux guerir, mets des plumes d'Aigles sur ton corps en la façon que ie te diray: tu es mort si tu n'obeïs; sur tout ne prie plus, c'est la priere qui te fait malade.